

SAC den pleno preparacion pa diabierna awor

A tira lot pa eleccion final di Reina Infantil di Carnaval



ORANJESTAD (AAN): Den fin siman candidatanan pa e eleccion di Reina Infantil di carnaval a tira lot, durante un evento na Aruba Trading. Ey cada un di e 10 candidatanan participando diabierna awor pa e corona di Reina Infantil di carnaval a haya nan number. E eleccion mes ta tuma luga diabierna dia 31 di januari 2014 cuminsando for di 7:00pm den Aruba Entertainment Center. Carchi ta obtenibel caba na oficina di SAC.

Despues di a tira lot, e secuencia pa eleccion final a bira candidata number 1, den persona di Alysa Brete di Jolly Wizz Kids, sigui pa # 2 den persona di Zairey Colmenares di Grupo di baile y canto Pierewietje, candidata # 3 ta Cherry-Ann Martes representando distrito di San Nicolas, candidata # 4 ta Xeandrah Blanco di Grupo Champagne, candidata # 5 ta Jayna Alavarez representando

Dakota, sigui pa # 6 Jada van Heyningen representando e distrito di Sta. Cruz, candidata # 7 Shakiene Coffi di Little Groovers, candidata # 8 ta Jeanylaine Boekhoudt representando T.O.B Carnival Group, candidata # 9 ta Sheqayli Asencion representando Oranjestad/Companashi y candidata # 10 den persona di Thamara Vrolijk den representacion di e distrito di Noord.

Aruba Trading, como agente di e producto Revlon, ta patrocinado principal di e evento. Como un gesto special a entrega cada un di e candidatanan un regalo. Ta ora cu nan a habri e regalo, nan a haya nan number pa e anochi final. Pues den un forma masha creativo a percura pa regalo y nan number na mes momento.

Carnaval di Aruba a nace na aña 1954 caba, como tal e aña aki nos ta celebra 60 aña cu anualmente pueblo ta bini hunto pa muestra nos creatividad, ambiente y folklore manera nos so por. Na aña 1955 varios club y districtonan a bini hunto pa organiza e carnaval y di eynan a eligi e prome Reina di Carnaval. E parada grandi tradicional a cuminsa desde aña 1957.

Pero tabata dia 11 di november 1966 (11-11-66) pa 11:11am cu a funda Stichting Arubaanse Carnaval, SAC. Desde e tempo ey e fundacion, forma pa un grupo grandi di boluntarionan cu hopi entusiasmo, ta traha duro pa organiza e diferente eventonan cu ta atrae un publico grandi di nos mesun ciudadanonan pero tambe turistanan.

